

Cumprar bellas chasas grischunas e lavar daners nairs

Resposta da la regenza sin l'intervenziun en il cussegl grond

CUN SASCHA MÜLLER
HA DISCURRÌ CLAUDIA CADRUVI / ANR

■ **Betg mo il turissem, era metodas da lavar daners, chatschan ad aut ils pretschs da chasas ed abitaziuns en regiuns da renum mundial. La regenza grischuna snega l'existenza dal problem.** Il deputà *Sascha Müller* (ps/Tavau) aveva inoltrà il settember sia dumonda pertutgant «lavar daners en il commerzi d'immobiglias» e l'emna passada ha la regenza respundi. Müller na va betg d'accord cun las explicaziuns e ponderescha d'interpreter ulteriurs pass.

La regenza na crai betg ch'i vegnia lavà daners systematicamain cun la cumpra d'immobiglias. Tge schais Vus da la resposta dal guvern?

Sascha Müller: La regenza grischuna ha memia pauc curaschi da sa deditgar a la tematica. Ella na vul betg zappar sin ils pes ad insatgi. Sche la regenza schess ch'i pudess esser ch'i vegn lavà daners lura vegniss immediat la dumonda: Tgi lava daners cun immobiglias? Uschia daventass la regenza automaticamain quella ch'inculpescha.



Sch'ins vul suttaimetter il commerzi d'immobiglias a la lescha davart il lavar daners ston ins obligar ils mulissiers, notars u agents d'eruir la derivanza da tals daners.

MAD

La regenza na vul betg mussar cun il det sin insatgi

La regenza na vul betg specular, tgi che pudess eventualmain lavar daners cun fatschentas d'immobiglias en il Grischun. Ma la regenza ha era malchapi mia intervenziun. Jau less cuntanscher meglras controllas dal commerzi cun chasas ed abitaziuns. Probabel na vul la regenza ord motivs ideologics betg daplì regulaziuns. Sin champ federal han ins onns a la lunga discutà controllas

pli rigurasas. Quellas èn vegnidas cum-battidas vehementamain da la bransch d'immobiglias. La regenza grischuna scriva en sia resposta: «A las organisaziuns da bransch èsi gartegià da mussar ch'il commerzi d'immobiglias en Svizra haja gia prescripziuns suffizientas.» Quai munta en sasez nagut auter che: La bransch ha fatg lavur da lobi cun success.

Nua vegn lavà daners cun la cumpra da chasas?

Ins na sa betg nua. Exact perquai less jau controllas. I dat lieus enconuschents sco Tavau, Claustra e San Mu-

rezzan cun renum internaziunal, nua ch'ils pretschs d'immobiglias èn auts. Tenor ils experts è quai terren ideal. Cun auts pretschs pon ins lavar grondas summas. Plinavant na crodi betg si sch'insatgi chatscha anc ad ault artificialmain il pretsch ed i vegn pajà ina summa stravagada per in object. En regiuns cun pretschs favuraivels dat quai immediat en egl sch'in chasament custa tuttenina il dubel. En in lieu turistic po in cumprader dentant pretender: «Jau vulev exnum ina chasa a San Murezzan, n'emporta betg per tge pretsch.»

Danunder vegnan persunas che lavan daners?

Ils experts èn dentant da l'avis ch'il potenzial è cunzunt grond tar persunas ord ils pajais da l'ost. En quels pajais van las controllas da bancas savens pe zop e las autoritads èn pli spert prontas da serrar ils egl. I dat sa chapescha era Svizzers che lavan daners u burgais da l'Europa che vulan mi-tschar da taglias.

Tgi che cumpra ina chasa regla la fatschenta per il solit via banca. Bancas svizras èn suttaimessas a la lescha davart il lavar daners. Co funcziuna ina cumpra cun daners nairs?

Il pli grond problem exista tar la cum-

pra en daner blut. La fatschenta tranter vendider e cumprader vegn fatga cun daner blut. Tranteren sa tschentan ils daners forsa anc sin in conto dal mulissier d'immobiglias. Lez na sut-tastat betg a la lescha da lavar daners e n'è betg obligà d'eruir danunder ch'ils daners vegnan e nua ch'els van. Quai è il problem. Sch'ins vul pia suttaimetter il commerzi d'immobiglias a la lescha davart il lavar daners ston ins obligar ils mulissiers, notars u agents d'eruir la derivanza da tals daners.

La bransch ha fatg lavur da lobi cun success

Avais Vus en senn d'inoltrar in'ulteriura intervenziun?

Jau discurr da preschent cun experts e cun mia fracziun en il cussegl grond. Cun mia dumonda hai jau vulì eruir la posiziun da la regenza. Jau n'exclud betg d'interpreter anc ulteriurs pass politics via cussegl grond.

Tgi èn ils experts che s'occupan da questa dumonda?

Dad ina vart datti experts tar la Fedpol, la polizia da la confederaziun. Els scrivan en lur rapports ch'i dat problems cun lavar daners en il commerzi d'immobiglias. Era «Wüest und Partner» han deditgà in entir chapitel a la problematica en il nov monitoring ch'è cumpari l'october. Lavar daners cun immobiglias è in problem enconuschent per ils experts da la bransch. Sin champ politic n'èsi fin ussa betg stà pussaivel da realisar controllas pli severas. La lobi d'immobiglias sa dosta cun pes e mauns.